

乾隆歷城縣志

歷城縣志卷第七

山水考二

山二

禹登山又西北為大孤山大孤山西為七里磴之南山
又西為八里窪之東山山形至此中斷又西北復起為
八里山以去城八里故名明尹旻墓在山之陽又北為
六里山明陳九疇墓在山之西又北為會仙山會仙山
一名馬鞍明秦琰墓在山之陽其西為四里山四里山
又名赤霞山自大孤山至此可十五里

大孤山在佛慧南

舊志

八里山在馬鞍山南

馬鞍山在城西南四里形如馬鞍上有王母廟三月三日為蟠桃會士女雲集又名會仙山

四里山東連馬鞍山上有玉皇廟亦名赤霞山

許邦才九日于鱗招登四里山詩新詩忽自故人來
令節黃花初發醅城外青山城裏見離邊那忍獨徘徊

山頭對酌夕陽斜下見湖城十萬家賸有登高酬令

節何人正不負黃花

以上俱
舊志

大孤山北為佛慧山自禹登山之下無高於佛慧者佛

慧山一名大佛頭山以巖半有石佛頭故也又名大佛山下有開元寺歷唐宋迄明皆為名刹今廢開元寺之東北巖為抗頭山

歷山一名大佛頭山以山南危石矗立如佛頭也亦名千佛山或以為即遷祓之訛耳按今名開元寺舊名佛慧寺皆一山也

曹學佺天下名勝志

按名勝志以佛慧山即歷山開元寺即千佛寺誤辨詳後

大佛山在城東南十里一名佛慧山上有文壁峯下有甘露泉中有寶刹曰開元寺舊名佛慧寺有宋題

名刻記懸崖鑿為石室昔人多讀書其中今廢此山
峯巒突兀澗谷縈迴丹樹黃花更宜秋色有修落帽
故事者無不吟眺於此故八景標為佛山賞菊舊志
朱龍澗在大佛山西北澗陡而幽林壑深邃

百尺澗巖秀而長亦復陡絕

抗頭山在城東南七里與大佛相連

目塵洞在甘露泉西歷下諸生張得宿等數人遊於
此因得廢洞修之有箕仙書目塵洞引

功德洞在開元寺北義公禪師涅槃處

樊嶽科遊大佛山記大佛山去千佛幾五里予以中

秋爽氣邀比部平君與朱宋二大夫飲於大佛山之
巔中為開元寺建宋景祐間寺址湫隘顧四山如抱
石勢崢嶸藤蘿森翠僅西一隙通人境宜隱者居也
寺北為大石巖鑿洞上下為二石室儒生讀書其中
稍東沿石壁下架草為簷而寺之庖湑諸器具咸置
石竅間復數步許即壁上鑿佛像高二丈餘傍有石
池泓漾為僧人銑鉢處西轉即寺殿殿之前多古樹
濃陰可憩宋大夫即樹下布席為局飲飲罷南行為
石徑垣列巉石多詩記苔蘚不可讀仰崖上峻削稍
凹為洞朱大夫曰是宜遠而眺遂索梯援躡平君先

躡遂次而躡躡草樹間輒席地趺坐命歌者蹲巖下而歌聲顧在樹杪矣西覲千佛山如屏几落照烟霞參橫谷口舒嘯相酬飲復梯而下下有石池特深澗丈許水淙淙石縫中名甘露泉色澄澈可鑑鬚眉子獨挹巨觥吸之冷冽徹肺腑又東行十數步有石窟如井深百尺許初窺之黝窈沉沉已乃冉冉有光極底見泉穴蕩漾如湧濤蓋泉石激地洞中微與日影爭閃爍云已復西向昇輿倒折而下日方晡遂燈行澗中視山巖大石像數處即俗稱大佛頭山也無何月懸山脊林莽豁然視華不注諸山蜿蜒聯絡而崇

岡曠野咸在覽中予復令吏亟熱水供飲時漏下二鼓矣

劉勅大佛山詩去郭十餘里山迴石徑幽白雲嘗覆寺黃菊最宜秋塔影樽前轉湖光望裏收甘泉幾滴水能解世人愁

以上俱舊志

佛慧山或曰即歷山非也佛慧山之西為羅家寺山山之陽為圍馬場又西北始為歷山歷山即舜山見魏書隋書一名舜耕山俗名千佛山以巖間多佛像故也或曰千佛者遷祓之訛自禹登山至此可十餘里

晉世家晉伐齊戰靡下

史記

徐廣曰靡一作歷史記集解

劉氏靡音眉綺反即靡筭也司馬貞史記索隱

城南對山山上有舜祠書舜耕歷山亦云在此所未

詳也水經注

歷城有舜山隋書地理志

魏僕射收臨代七月七日登舜山徘徊顧眺謂主簿崔曰吾所經多矣至於山川沃壤襟帶形勝天下名州不能過此唯未審東陽何如崔對曰青有古名齊得舊號二處山川形勢相似曹聽所論不能踰越公遂命筆為詩於時新故之際司存缺然求筆不得乃

以五伯杖畫堂北壁為詩曰述職無風政復路阻山

河還思麾蓋日留謝此山阿

西陽雜俎

齊郡接歷山上古鐵鎖大如人臂繞其峯再決相傳
本海中山山神好移故海神鎖之挽鎖斷飛來於此

同上

歷山在縣南五里

太平寰宇記

曾鞏齊州二堂記舜耕歷山以余考之在齊者是也

詳見古蹟考

歷山府南五里一名舜耕山古有舜祠曾南豐記云
云或者不此之論乃備載陸魯望象耕鳥耘之辯可

見其贊通典云山有太甲冢未詳歷山南屬泰山東
連琅瑯崇岡疊嶂脊脉不斷欽嘗有詩云濟南山水
天下無晴雲曉日開畫圖羣山尾岱東走海鵲華落
星青照湖此濟南山勢也

齊乘

歷城有歷山

明史地理志

歷山俗稱舜所耕處或以為即靡笄山靡歷字相近
也

方輿紀要

昔之守濟南者以澗為固元史史樞傳董搏霄傳云
云今其遺跡不復可考志書亦不載此二事

歷山在城南五里亦名千佛山有隋開皇間所鑄佛

像石作形因建寺曰千佛寺

志

龍泉洞在千佛山賓華亭南免兒嶺千佛山西南賞

菊崖千佛山後

同上

邊貢九日登千佛山詩南山空翠輝野老倦登臨城

郭千年跡雲霄萬里心夕陰涵積水風葉下長林短

髮新來白黃花不可簪

華泉集

趙秉忠遊千佛山詩空翠蒼茫出化城諸天歷歷接

雲平龍泉乍湧千巖濕佛日高懸百雉明檻外松花

清客思座中梵語帶潮聲若非盡去因緣識誰解青

蓮足下生

嶼山集

李攀龍杪秋同右史南山眺望詩南山有幽意駕言
此徘徊湖波蕩寒城四座清光開金天澄素影秋氣
何悲哉繁陰逼白日浮雲閒往來落葉颭中林流飈
激巖隈朝昏上烟火原隰被樓臺故鄉無滯浮世路
多塵埃念我平生歡離思壯難裁

汝濱集

遊佛山詩青樽何處不蹉跎白髮相看一醉歌坐久
鏡中懸片華望來城上山雙河松杉滿壁浮雲淨砧
杵千家落照多縱使平臺秋更好故山猶恐未能過

同上

蔡經同張侍御登歷山對華亭詩三首歷下名山秋

復登丹崖青嶂鬱層層徑緣采菊行將徧檻為看雲
悵獨凭遠岫斜陽迷去鳥疎林涼月送歸僧凌高小
結依龍洞坐對華峯翠欲凝

秋日南山氣轉嘉紫廻石磴帶晴沙琳宮上接三千
界雲厨遙連幾萬家千頃蒼茫凌菡萏諸峯羅列鎖
烟霞同遊並是觀風客極目應憐草樹斜

舊志

潘子震登千佛山寺詩野寺秋光載酒看詩懷猶為
惜秋殘山空雨濯雲逾白樹老霜侵葉更丹斜日半
窗松影亂懸崖數滴水聲寒閒來直作藤蘿客誰信

刀圭生羽翰

同上

蔡穀九日登千佛山詩索居逢九日山寺一登遊紅
葉西風晚黃花細雨秋雁從寒樹沒嵐帶遠山浮何
必茱萸酒清吟亦遣愁

沒濟集

劉勅千佛山詩數里城南寺松深曲徑幽片湖明落
日孤嶂插清流雲繞山僧室苔侵石佛頭洞中多法
水為客洗煩愁

舊志

施閏章濟南九日登歷山詩看山結伴太逡巡杖策
貪趨采菊辰天際長風正落帽樽前今日是閒人蒼
巖石壁孤城影深洞莓苔古佛身薄暮寒烟連海色
華峯千丈獨嶙峋

愚山集

王士正初望見歷下諸山詩行人千里發燕關衰草
平燕黯旅顏十萬芙蓉天外落今朝正見濟南山

集

田雯同郭廣文登千佛山詩出郭二里餘雨晴疊嶂
晚杖策只緩行不知入林杪窺窈窕松磴細披翦石棧
杳振衣最高峯送目皆可了人家萬柳陰湖西一鏡
小鵲華爭峭拔衆峯凌天表佛
嵌虛巖蘚徑穿麓
篠谷口淨無雲恆仰看飛鳥

古懽堂集

王革雪後游千佛山詩雪花亂灑秋浪暮石髮長埋
子固祠只剩題名泉上水春風啜茗記當時

二十四泉草堂

張元登千佛山詩風日肅明霽坦步出南郭抗懷物
外遊履險凌巖壑蒼松森蔽虧蔭翳壁面削山風吹
白雲散漫紛布溼厓窵闕珠龕壘嶂倚仙閣積水陰
洞深絡繹怪石攪窈窕屢灣環歌傾仍倚著濕翠交
嵐光杳靄餘參錯頗訝鴻濛初誰為施斧鑿徙倚縱
遐眺凌臨窮寥廓烟鬟漾鵲華瑤流明濟灤雄城半
烟水樓閣涵澄泊湖山疊蒼翠一一歸領畧須臾四
山暝素月穿林薄峭嶺生夜涼爽籟蕩煩悶閃閃佛
燈明歷歷梵誦作了此世外緣胸臆倏開拓仰視星

漢流坐覺天宇橫踏月下層巒宿霧擁山脚迴奔一

以晚幽磬雲中落

綠筠軒集

沈廷芳登千佛山詩用邊華泉舊韻佳日招攜懷共
登南山爽氣翠千層懸空赤壁捫蘿上俯礪紅亭帶
樹凭拄杖不辭盤曲磴勞人轉愛對閒僧鵲華兩點
未能到却望蓮趺遙睇凝

隱拙齋集

朱崇勳九日登千佛山詩翠微秋色裹著屐上層峯
黃葉落無數白雲深幾重寒烟籠澗菊返景入巖松
渺渺憑高目臨風倚短筇

朱令昭登千佛山詩在世憂勞久爭知物外閒緩尋

殘燒路小立夕陽山雨寺鐘相答千林鶴獨還惟應

一樽酒攜客屢追攀水明樓集

縣北境之山皆砂石色多黑類泰山石其脉皆根於南山然斷而特起數峯錯列望之似不相屬而勢拱乎內其在東北境最高且大者曰華不注山見春秋左氏傳一名金輿山亦名華山去城十五里山下有華泉昔流入於濟今涸矣

三周華不注春秋左傳

華不注山名杜預春秋經傳集解

歷城有華不注山華泉魏書地形志

濟水又東北經華不注山

水經

單椒秀澤不連陵以自高虎牙桀立孤峯特拔以刺

天青崖翠發望同點黛

水經注

歷城有華不注山其山直上如筍

通典

華不注一名華山在歷城縣東北十五里不讀如字

李吉甫元和郡縣志

華不注山輿地志云一名金輿山

太平寰宇記

金牛洞在華不注山下

舊志

迴車澗草澗在華山下郤克逐齊侯處也草俱連鶩

蔓生如旋螺俗云兵車繞匝所致

同上

飛仙巖在華不注山半

據石刻

華不注山左傳從齊師至於靡笄之下則此山亦名

靡笄

靡與摩同

山前道院中有石刻太白諸賢詩院前即

華泉水與小清合流

齊乘

華不注伏琛三齊記云不音跗讀如詩鄆不韡韡之不謂花蒂也言此山孤秀如花跗之注於水也按詩箋云祿華者鄆不當作跗鄆足也疏云華下有鄆鄆下有跗也古音不跗同左傳成公十六年有韡韡之跗注註云韡韡戎服若袴而屬於跗與袴通疏云自腰以下而注於脚當是古人有此語耳齊乘華不注

亦名靡笄山非也左傳云從齊師於華云六月壬申師至於靡笄之下云癸酉師陳於鞍曰逐之三周華不注曰丑父使公下如華泉取飲其文自有次第鞍在華不注之西而靡笄又在其西可知金史長清有

劉笄山

顧炎武山東考古錄

戰於鞍與三周華不注同是一日計不甚遠而穀梁傳曰鞍去國五百里者據公羊傳注古六尺為步三百步為里今以三百六十步為里而尺又大於古四之一今之六十二里遂當古之百里今歷城至臨淄正符此數孟子千里而見王以今計之自鄒至齊亦

不過六百里也

同上

秀水徐善敬可為人撰左傳地名訖問余成二年鞍之戰杜註止云齊地穀梁傳則云鞍去國五百里恐非以下文有華不注山山下有華泉證之鞍似去此不遠當屬今歷城縣也余曰通典濟州平陰縣註云左傳齊晉戰鞍故城在縣東

北地志衆
宇記同

蓋唐世鞍故城尚存故杜以為據余意鞍在今平陰東作四五十里其去華不注山亦一百三四十里朝而戰於鞍勝而逐之一百三四十里之山下且三周焉晉人之餘勇正可賈哉齊奚足云蓋古駟駕一車車僅三人御

復得其法故取道致遠而氣方有餘今人不明乎此
徒以平陰屬兗州歷城屬濟南中隔長清縣境如是
其遠豈能一日通作戰場茲所以見通典亦未之信

與

閻若璩潛
邱劬記

華不注不音附附注戎服山形似之故以為名也

萬卷

閑話

王惲遊華不注記濟南山水可遊觀者甚富而華峯
藥源為之冠余到官八月湖光山色朝夕與對於庭
戶几席間若無所覩心有所不快焉然每以歷居卑
濕為念或有云堰頭者迺自西潑引諸泉入大清之

峻口也一鋪之力不崇朝可徹而陸之常欲一往而
未遑也冷竄節得暇且寬憲使耶律君邀余暨簽書
杜君為茲山遊且尋堰頭之盟諾焉迨十有一日遂
自歷下亭登舟亂大明湖經會波樓下水門入廢
齊漕渠所謂小清河者是也汎灇東行約里餘運肘
而北水漸瀾漫北際黃堊東連疊徑悉為稻畦蓮蕩
水村漁舍間錯烟際直畫圖也於是綠萍蕩槳白鳥
前導北望長吟華之風烟勝賞盡在吾目前矣是日
也天朗氣淑清風徐來水平不波鳴絲歌板響動林
谷舉酒相屬開口而噓少頃扶掖登岸相與步入華

陽道觀主人方布几延賓僕以疾作遽還二君為悵
然也至於罔獲陟連雲絕頂追謫仙之逸駕叫蒼梧
之暮雲富覽江山以盡遊觀之美特閒適餘事初不
訝其從違正恐山靈獨回俗駕造物者有所靳耳既
歸伏卧舟中怲怲焉如宿醒在懷殊伊鬱也但聞兩
舷間風水之聲自宮自商拍拍盈耳殆魏獻子之歌
鐘石鐘山之水樂也且念華峯之勝樂在近郊因以
步里計之自歷亭北至華陽院下二十里而遠由水
門抵黃臺北渚十八里而近以葦汀漁箔周折灣渚
從城東北阿至艤舟山家蓋且十曲矣

古今圖
書集成

亢思謙遊華不注記畧華不注之奇聞宇內舊矣嘉
靖壬戌季秋既望余復齊之三月值政務稍清乃約
司農南海黃公可大憲長豐城雷公達憲副上黨李
公敏德安成劉公佃閩帥仁和周公塾淮陽劉公煥
往遊焉道故自大明湖出水關時關門樞腐不可開
乃出齊川門由陸行穿澮畝間秋雨新霽野無纖埃
稻刈方登抵華陽宮會食廣庭中頃則逶迤造山麓
仰視孤峯四無延附峭拔特起如碧凝黛染直侵雲
表奇石雜列若虬龍虎豹盤踞奮揚攀延而登窮峯
之奇俯視齊城若在几席下羣山環峙泉流交注湖

光樹色映帶左右斜陽暮靄煒耀飛揚誠天下奇觀

也

舊志

李煥章登華不注記畧崇正庚午偕徐君大拙放舟
大明湖出會波門沿劉豫廢漕渠而北至華陽宮登
玉皇頂南瞻泰岱環視鵲窠匡諸岡巒雖銳小皆獨
立傑削無附麗羣山意酌逢丑父下飲華泉弔三周
戰處誦太白詩今古之際樂間以悲

續集

李白古風一首昔我遊齊都登華不注峯茲山何峻
拔綠秀如芙蓉瀟灑古仙人了知是赤松偕余一白
鹿白挾雙青龍含笑凌倒影欣然願相從

太白集

曾鞏華不注山詩虎牙千仞立巉巖峻拔遙臨濟水
南翠嶺嫩嵐晴可掇金輿陳迹久誰探高標特起青
雲近壯士三周戰氣酣丑父遺忠無處問空餘一掬

野泉甘

南豐
數稿

郝經華不注行崑崙山巔半峯碧海風吹落猶帶濕
意氣不欲隨羣山獨倚青空迥然立平地拔起驚孱
顏劍氣勁插青雲間濟南名泉七十二會為一水來
浸山我來方作鯨川遊玉臺公子邀同舟君山浮嵐
洞庭晚小孤滴翠清江秋酒酣興極烟霏昏魚龍慘
淡迴山根少陵不來謫仙死舉杯更欲招其魂魂兮

不來天亦老元氣崔嵬山自好超超絕頂凌長風注

目東溟望蓬島

陵川集

張養浩遊華不注詩蒼烟萬頃插孤岑未許華山冠
古今翠刃刺雲天倚劍白頭歸第日揮金攀援正欲
窮危頂歌舞休教阻壯心星月滿湖歸路晚不妨吟

棹碎清陰

舊志

宋裴渡濟河初見近城諸山詩華山高聳鵲山東一
帶烟霏翠埽空安石從來多逸興却如新婦閉車中

燕石集

王廷相登華不注山歌爰葉登濟城瞰華不注峯蒼

壁削孤雲怪石蟠虬龍驚風噴瀝萬里來靈氣直與
秋爭雄岱麓羣峯秀嫋娜連蕤芙蓉萬千朵白日雲
霞相蔽虧梁父徂徠明一火崑崙華不注別出三山
支仙人移家過西海墜落拳石成崔嵬平地突兀青
刺天不一倚附資維持我昔東遊走其下泉上盤石
一停馬羣磴查牙不得上胸次巉天詎能瀉濟水奔
流東入海綠波繞山年年在紫鳳不來烏鳶翔石上
琅玕日沉彩嗚呼風塵瀕洞兮逢時之危龍蛇遁藏
兮豺狼恣睢孤臣獨立兮不愧茲石浩蕩沈寥兮極
於兩儀

陸通志

王世貞望華不注詩華不注何崎嶇青天削立峯岑
寄語三周鐵騎何如一杖登臨

冠蓋人人白雪生涯處處青山莫怪攀龍任酒土生

猶在人間

見魏志

李攀龍與轉運諸公登華不注山絕頂詩中天紫氣
抱香爐複道金輿落帝都二水遙分青嶂合一峯深
注白雲孤岱宗風雨通來往海色樓臺入有無不是
登高能賦客誰堪灑酒向平蕪

滄溟集

方文華不注詩歷城東南隅故有華不注晉師逐齊
侯三周即此處其山拔地起四面無依附孤峯秀插

天娟娟入雲霧我來恣遊覽艱險殊不顧磔砢千萬
石上下無一樹遠望如芙蓉萼萼未開露所以名華
不古人亦善喻今人罕識字相呼失其故趙李趙子昂李

龍攀乃詞宗如何音亦誤明詩綜

按元和志云不讀如字趙李固有所本也

劉勅華不注詩亂石堆雲立孤峯入碧天杯浮銀漢
水袖挽海門烟帆影清流外湖光落照邊好乘白鹿

去蓬島覓羣仙舊志

王象春華不注詩單椒傑立虎牙懸鎖盡狂奔七十

泉怪得仙人赤松子獨將鹿借李青蓮齊音

王大儒同諸友登華不注詩看山如讀書熟則刪所
戀層折取其新即此窺候變不注近桃蹊登臨良我
便茲則獨淹留衆前我則殷獨酌眺歸鴻諸峯開面
面風日發寒香秋老霜林靖

華不注志

葉承宗登華不注詩我愛華不注茲峯何秀特奇巖
變形勢怪石殊顏色鳥道荒蔓紫蟲跡積雨沕懸崖
疑無倚疊嶂如相逼探奇歷峴欽轉徑入幽仄逡巡
履峯脊攀援摩山肋凭高發長嘯遇坦得小息旁矚
鵲峯聯俯瞰清河直日夕野風發為我生羽翼聞有
贈鹿翁求之不可得徙倚晚烟中曠懷誰復識

集西

王士祿華不注歌濟上羣山青破碎稍如犄角少附

麗獨有華不注最奇虎牙傑立尤孤銳憶昔九日登

茲峯

戊子歲

發興還緣兩鉅公廣平

非先生

意豪疲杖策

半峯掃石趺長松龍眠

若侯先生

銳氣凌天風窮巔造極

無留蹤我時突兀相追從函山鵲湖出眼底哀絳蒙

竹當樽濃抽毫揮卮杳相問未暇搖落悲霜楓歲月

回頭如轉燭風流雲散誰能續兩公各挂貞白冠賤

子塵埃仍碌碌渠獨無能嗣勝遊并艱放眼空青曲

歸轅東路一興懷虛羨仙人跨白鹿

十笏草堂
辛甲集

王士正望華不注懷古詩老慵便卧與北風吹龍涼

春簾華不注時來歡青蒼想像易位處東南私縱橫
齊晉昔更霸往事可憐傷豈知婦人笑遂召四國殃
華泉終古流不見繫車桑晚投喬木村蠟炬明紫堂
天低雪欲作四顧雲茫茫明日度溪釣早梅應破黃

蠶尾集

華不注詩天半落空青孤峯削翠屏雲霞紛卷霧洞
壑秘神靈弔古思仙棹探奇驗水經登臨近重九風

日接滄溟

漁洋集

秋日遊華不注詩二首華不注制寒碧日入風景清倒
影散平楚翠色連州城花萼跼明水虎牙刺空青安

得白鹿翁從彼昇天行

單椒何翠發凝望疑點黛長嘯訪赤松景飈激天籟
碧湖涵已久青山尚如繪金粟古如來音塵復何在

同上

戊辰人日雪行華山下作吾州最愛華不注白日青
天卓虎牙一夜山中三尺雪曉來失却青蓮花忽雷
聞下流漸急華嚴宮前雲霧遮轉憶石帆亭子畔老

梅寒竹闌橫斜

集 蠶尾

遙和嚴顥亭施愚山秋日登華不注之作齊烟九點
散清秋花萼孤明萬仞浮絕澗但連行父壘平湖不

見謫仙舟戰峯汎鵲俱陳跡白芋青藤復勝流高詠

豈殊陶謝手少文潦倒愧同遊

漁洋集

郡城北路作齊州南北千峯繞中有明湖一鏡分今

日雪中更奇絕華山雲接鵲山雲

黠尾集

華不注詩憶下巫山翠萬重江雲峽雨試輕容依稀

三十年前夢十二峯中見此峯

黠尾續集

田雯華不注詩水滙如凹白茲山乃穿挂一峯矗太

清不與衆峯侶離離螺髻垂翠綠淨可數兩柳石髮

細雲裂松髯補天風吹我來理第歷半塢蹙蹙盤徑

幽窈窕奇花吐企脚筋力微兀坐思翺舉上界傳梵

鐘採藥探瑤圃騎鶴伊何人嗒然聞笑語

昔聞謫仙人曾此一振衣千仞青芙蓉蕭颯揚清輝
赤脚不可尋烟雨何罪微御風凌絕頂援鶴時相依
上接天漢津片石見支機瑤臺終杳冥日斜照靈旗
安得攜長鏡去剗黃獨肥散髮俯灤川悠悠素心違

古懽
堂集

董文騏華不注詩東嶽勢欲盡餘勇賈茲山邱陵莫
閒遶突起蒼莽間單椒拔其麓虎牙叢其顙我以王
事便斯游任躋攀飛石落未落浮雲閒不開雲根出
於石石狀殆千百其陽見三面黛黑遙相射自南自

東西其勢率以積衝然角而上若困獸踣躑欻然累而下若寢獸窟宅或攢高青劒或排澀玉戟或如覆盆甕或如秩肴核或敞如元堂或削如鐵壁行陣整如戰基置散若夾紆而坪如掌負而立如跼趑而欲搏人怒而自相齟南上六百步置屋於石隙祠彼古仙人憩我躋勝容祠旁折而西怪石相崩迫直上一里許山腰造山額蛇行大牙間捫蘿濟雙筏躋頂平地少仰面去天尺力稀喘喙眠徐起須人策近俯齊州城翼瓦分廣陌明湖懸玉鏡灤水泉絡繹歷山亦破碎岳影渺空碧如孫顧祖禰如帝朝百辟其陰俯

山北石更奇而赤瑣屑不足名鰲背銳三脊太華之
一峯巋巋兩向壁西北望鵲亭湖堙土已斥甫也歇
馬處憑弔仰詞伯吟眺憺忘歸陟降曰云夕歸來憶
壯觀突兀動魂魄空翠猶在眼園詞多格格綠秀如
芙蓉語特寫其跡挂一而漏萬草此補太白王士正感舊集
朱彝尊華不注詩仙梵開初地春秋識舊名青蓮齊
吐萼石筍獨抽萌泉憶邊庭實居連許殿卿淒涼懷
舊意驅馬入荒城聯書亭集
趙執信華不注山行跋者御跋者登婦人帷房聞笑
聲笑聲未絕晉師興華不注山千青冥山前東畝何

縱橫欲尋丑父易位處華泉之水今猶清紀甌與玉
磬差異城下盟寡君奉親以色養豈意社稷將隨傾
嗚呼寧獨巧笑能傾城

俗山集

朱綢登華不注詩東風騎馬來出郭二三里取路入
崦嵫蒼翠拔地起濕嵐撲春衣小橋列雁齒巖邊者
飛帛千尺溜雪髓天際螺髻青石上苔錢紫山境隨
處佳誤到亦可喜小廟掩紅扉寂寞桃花裏扣門逢
僧雛就坐施蒲椅山伴三五徒竹杯傾籃尾幽磬一
聲來深林醒醉耳起視舜子城亂烟隔山背

楓香集

王樛登華不注詩丹嶂迴環翠幾重挿天孤起綠芙

卷之十一 山二
蓉巨靈點綴名泉色西嶽新移玉女峯

山左詩鈔

張元華不注歌君不見華不注一峯秀絕絕依附
磳磳直上矗高空青冥撐破單板露我時騎氣叩天關
舉手上抵銀河灣初從下界望上界雲中飄緲如點
黛忽憑虛而御風遂高舉而無礙此身渺不知其在
何許但覺當胸瀾漫流沆漑信知此境非人境流雲
空翠沾衣冷呼吸恍接閭風巔咫尺坐見扶桑影天
風颯然來吹散白雲堆疑有古仙人鸞鶴紛徘徊我
聞李青蓮曾此相追陪此事經千載或復下九垓迴
合瀕氣空演漾白鹿青龍安在哉緣此徙倚不能去

袖拂冥濛踏烟霧華峯十丈蓮少室三花樹我昔落
見之於此倘一遇須臾滅沒日銜山憶昔何人戰此
間騰騰戰鼓殷巖谷取水更衣如轉環一笑尋常事
三周直等閒千秋遺鏃埋荒草芙蓉綠秀還如掃俯
仰此陳迹翻令傷懷抱傷懷抱胡為爾古今恩怨皆
如此何如矯首排天閭振衣萬仞俯茫洋即看兔魄
湧滄海笑倚孤峯弄月光

綠筠軒集

劉伍寬登華不注詩一點芙蓉聳太空高隨飛鳥步
巖叢河流低繞紅樓院岱色遙收紫柱宮金輦還傳
寒澗側玉棺誰貯夕陽中不須謝眺驚人句呼吸惟

教帝座通

海右堂集

張康遊華不注詩平原秀單椒刺空點蒼黛石氣豁
孤清林光森虛曖湛挹華泉甘危扳翠崖間汲日雲
霏流睦耳鳥聲在鳥靜更超搖懷幽愈津逮機默趣
斯微靈超契無昧向殷弔古情茲與冲襟會翛然弄
月還得意琴樽對

張恕齋詩鈔

趙憲華不注下作插天突兀表孤岑一朶芙蓉出萬
尋不藉因依成峻拔自標骨格樹奇欹層層螺髻雲
烟裊簇簇鸞叢歲月深會有仙人赤松子偕騎白鹿

上頭吟

寶芝堂集

沁心華不注詩昔曾讀水經慕單椒秀澤客情因步
暇攜此雙蠟役佛鉢湧蓮花翠發攢奇石象緯過高
空心目涵淨碧牝虛閤靈氣疑有古仙宅名泉無纖
滓倒窺雲影白野禽棲林薄斜照落岸幘遠想一慨
然丑父留舊跡

孫石山房集

華不注之西南三里許曰黃臺山漢有臺縣在山之東
其得名以此山與否不可考魏書歷城有黃臺其為山
與否亦不可考元張養浩墓在山之陽黃臺山之旁又
有九里山茅山

歷城有黃臺

魏書地
形志

黃臺山在城北八里

舊志

黃臺在城北有金任詢詩

按魏書歷城有黃臺無山字舊志既列黃臺山於山川復列黃臺於古蹟豈山與臺非一地與或一地而異名與

九里山在城東北五里韓信破歷下嘗駐軍於此

茅山在城東北十里

以山傳舊志

任詢濟南黃臺詩三首
端目江南烟水秋
濟南重到憶南遊
便欲移家漁市側
輕蓑短棹弄扁舟

柴扉水際畫還偏
日落城頭晚更明
深綠淡黃洲渚

冷敗荷無數似臨平

綠柳橋邊簇錦鞍紅紗影裏照烟鬟歸來書几高燒

燭渾似江鄉一夢間

四朝詩選

華不注之東里許曰卧牛山濼水之分流經兩山間而東北注於大清河

卧牛山在城東北十五里

舊志

劉伍寬登卧牛山詩如此春光有幾回相將蠟屐步

崔嵬林中河水縈衣帶天外華峯落酒杯仙跡茫茫

遺故壘

雲芝先生得仙書於此山

文星耿耿傍曾臺

山上有文昌閣

老懷

未竟輸紅杏還可當風笑口閒

海右堂集

華不注之西北五里許曰鵲山凡城北諸山多秀削孤立鵲山獨橫列如屏風登歷山望之又若人之憑几矣
大清河經鵲山南華不注山北而東北注濟陽界

臨邑有鵲山

魏書地理志

歷城有鵲山

隋書地理志

鵲山王繪太白詩註云仙鵲煉丹於此俗又謂每歲七八月烏鵲翔集故名按仙鵲虛人近在今長清縣地煉丹此山若是古有鵲山院見陳後山詩

齊乘

鵲山在城北十五里濼口鎮其山無峯望之如翠屏

歷下客山勝而北方之鎮也華並峙每當陰雲之際兩山連亘翔翳環紫若有若無若離若合凭高遠望

可入畫圖雖單椒清溪削壁涵青名若靈異乃昔人
合標其勝曰鵲華烟雨自五雲氏分為休寧抑天翠
屏丹竈而烟雨二字
始無着落矣。稽志

鵲山下有鐘鼓二石樵夫牧兒爭往擊之聲聞數里

同

曾鞏鵲山詩一峯孤起勢崔嵬秀色拖藍入酒杯靈

藥已從清露得平湖常泛宿雲迴翰林明月舟中過

司馬虛亭竹外開我亦退公思蠟屐會看歸路送人

來

南豐
類稿

陳師道登鵲山詩小試登山脚今年不用扶微微交

濟漈歷歷數青徐樸俗猶虞力安流出禹謨終年聊

一快吾病失醫盧

后山集

王象春鵲山詩萬岫千巖濟水蟠如屏孤逗出河干

秋高烏鵲翔何事霄漢空疑斗女寒

齊音

劉勅咏鵲山詩一片孤峯俯大清凭高遙聽水流聲

翠屏倒逐冰濤白丹竈長懸夜月明帆挂夕陽波影

動舟橫野渡棹歌鳴山中靈藥應還在卜築巖頭度

此生

舊志

王士正歸經鵲華二山間即目詩山海作經首鵲山

招搖之桂生其間麗簪音之水出其下祝餘四照花

爛熳今此鵲山無乃是越人陳迹誰追攀灤水南來

紆且直羅生夾岸蘅蕪葢隔水正望華不注疑臨玉
鏡窺烟鬟是耶非耶看不定尹邢雙照蛾眉彎被山
瑋琇不收拾黃如蒸栗丹砂殷七十二閘遠鈎帶如
棋布子交廻環柳花滿樹綠於染杏花點地紅斑斑
始知今日已寒食潑火小雨回天慳濯纓湖亭好烟
景春波澹沲清心顏回首却望衛河北風沙莽蕩連

雄關

集 發尾

鵲華二山下作麥已登塲蠶不眠田家即事足忻然
迴塘殘港浮花鴨綠樹青林叫杜鵑袍笏久知如昨
夢鰲山猶欲了前緣過眉七尺紅藤杖伴我芒鞋幾

兩穿

黠尾續集

鵲山詩眼明忽見鵲山亭十幅臨流侵畫屏自是天

公薄梳洗雨餘涼出佛頭青

同上

田雯山桑落院步至扁鵲祠晚登鵲山詩繫馬策短

筇投憩黃桑院不見采藥人聲確石路轉初夏天氣

晴磔磔鳥聲變

古懽堂集

于紹舜鵲山詩鵲山臨水岸突兀玉為屏起伏龍蛇

狀飛揚鳥獸形峯高天漸白路逼眼偏青欲問神仙

窟征車未可停

涪山集

宋云鈿晨起望鵲華詩芙蓉秀出碧雙峯蒼翠遙連

曉靄中夜裏為誰分截斷半沉烟雨半浮空

秋蔭小詠

劉伍寬雨後欲登鵲山詩雨後山光翠一堆長河新

漲片帆開擬將烏笠青藤杖為訪當年扁鵲來

海右堂集

沈廷芳登華不注歷鵲山下詩山行屢誓期昔昔夢

魂繞蠟屐暑雨餘喜乘風日好水田學僧衣灌木罨

女薦靡靡度阡陌歷歷踰村堡黃臺徑倭陀月陽寺

山眇立馬在平岡摩笄挿雲表五里穿青叢一陂入

朗眺

歷水陂在山西

華陽舊有宮紺宇半頽倒金牛亦有洞

鮮磴儘窈窕其泉合洑流其磻隱古湫言尋觀風亭

遺址僅可考

亭在宮左今廢

不見逢閔祠忠孝空日皦

崇正祠向

祀逢丑父閔子騫後改
華陽宮祀四季之神

扶筇攬諸蹟賈勇脚不掉聲

确亂石間層層事幽討昂首崖高懸疎身路側繚那
無濟勝具振衣凌木杪周視天四垂萬象何浩浩須
臾循大麓平疇色青縹喚渡河之濞截流一葉小俄
聞蕭寺鐘已窺高栝標鵲山無峯巒孤嶂正悄悄到
院茗淪泉甘冽過清醪山僧導我前傑閣誰締造凭
闌望清河紆盤同曲沼招搖及麗傳惜哉失故道空
留湖亭詩吟諷傷懷抱賴存盧醫墳墓碣字了了
周盧醫扁鵲之墓丹甕騰虛名荒墟啼怪鳥未克升崇巔斜
陽照山晶匆匆策歸騎新出月正皎回首望兩山並

峙矜天矯遙注蓮荷擎卧展翠屏繞翠板暨削壁號
飛泉可少會當烟雨際涼秋坐昏曉長年樂斯遊白
雲堪送老大笑華臙人山林跡如掃

隱拙齋集

按扁鵲墓不見於他書恐未可據

其在縣西北境高不及華不注而勢若相敵者曰藥山
藥謂陽起石也即隋書之盧山一名齊山又名雲山或
曰雲盧字之訛也土人亦呼陽起山其西峯曰小九華
藥山之前麓有兩山相連曰輦山又名日月輪山明衛
青墓在其西李攀龍墓在其東輦山之西里許為栗山

歷城有盧山

隋書地理志

唐本注云陽起石經言生齊山齊山在齊州歷城西

北五六里採訪無陽起石陽起石乃齊山西北六七

里盧山出之本經云或雲山雲盧字訛矣今泰山沂

州惟有黑者其白者獨出齊州也

重修政和經史證類備用本草

藥山在府城西北十五里產陽起石上有蜘蛛石下

有蝦蟆石

陸通志

藥山在城西北十二里上有九峯並列蒼翠欲滴其

下有洞出陽起石

舊志

葦山在藥山南左傳晉伐齊師陳於葦即此

同上

按葦不在歷城辨詳見華不注

栗山在藥山南

同上

藥山前兩土山為日月輪山

郝煜既香
館遺文

晁補之齊山怪石森聳其西峯曰小九華詩山上有
山俱龍從谷中通谷更崦嵫借君筇杖穿奇險直至

西峯小九華

雞肋集

王象春藥山詩陽起石同膺膺登山涉海苦烝黎
何如筐埠無穿鑿猶得花開鳥慢啼

齊音

高瑾藥山雪中詩北風深谷鳴宛轉羊腸路寒日樵
牧稀冥冥天將暮六花拂面來岡林成散聚經冬草
木青山根氣如煦所以澗底石合藥起沉痾數峯參

差間片時更縞素遠村看不見微聞雁聲度崖邊破

板橋羸馬亦知懼從茲入窈窕定有幽人住飢鳥巢

松巔還叫滄溟暮

詩書
屋集

栗山之西南三里許為匡山匡山見魏書謂山形似筐故名筐者非也

歷城有匡山

魏書地
形志

太白隱居戴天大匡山故杜詩云匡山讀書處頭白好歸來學者多疑太白為山東人又以匡山為匡廬

皆非也

詩集夫唐
詩紀事

歷城北有匡山世傳太白讀書於此

齊
乘

筐山在府城西十里山形如筐故名

陸通志

筐山在城西北十二里李太白讀書於此

舊志

按舊志因齊乘而誤而唐詩紀事已辨之則其說之相傳亦已久矣

于紹舜行經匡山詩匡山天際落馬首獨離奇怪石如人立危峯似鳳儀丹青終不變斧鑿豈能施聞說

嶧山派神工誰得知

滑山集

匡山之東一里許曰黃岡山突起平岡自西南而東北長六七里若城之外垣矣柳塘河水經黃岡山北輦山南而東北注於灤

黃岡在城西十里

舊志

王士祿黃岡詩亂石散平阜知是黃岡道步步近鄉

山正成向東笑

十笏草堂集

張篤慶宿歷下曉行黃岡道中詩脂車方戒道雲黯

星光黑曉露霑我衣微茫見曙色修途帶城郭望望

煩登陟亂石似伏虎頽頽當路側崎嶇僕夫悴古道

多傾仄朝暾漸以升寒鳥整飛翼行行覓物化人事

良可識丈夫志四方寧復戀鄉國駕言千里途匪勉

自修飭人生各有役羣動皆食力往路如可懷悠悠

去不息

崑崙山房集

黃岡山東三里許為兩標山標山之北里許為紫荊山
灤水經標山北紫荊山南而西北注於大清河

標山在府城北十里山石並立如標故名

陸通志

標山在城西北八里

舊志

紫荊山在城西北十五里相傳田正哭紫荊處

同上

按田正非縣人此俗傳之誤十五里亦訛計去城
不過八九里耳

張養浩標山記綽然亭西四三里有雙山曰標各廣
四十畝童無樹林東西並峙皆青石疊蓋勢陂陀可
步而上按輿圖經無其名蓋土人以旁無他山惟此

若標可望故以名之其居東者上有洞如屋可避風
雨泰定甲子三月命童攜酒殺僭館客清江喻仁木
登焉始小有勞既戾其上神超氣逸身欲羽飛環視
衆山手若可即其聯巖屬巖盛於東南而微殺於西
北諸支流之水縈絡交碧練橫繩引折而復合蓋郊
外可登眺者莫此勝焉嘗欲構亭其上時杖復往來
以豁心目因仍未暇既而坐洞屋中出觴更酌詠古
人閒適之詩如陶謝輩抑者數篇其清歡雅思悠然
而集若世若形兩忘其所恃加以烟嵐空湧相與冥
合曾乎不知余之為山而山之為余也於是仁本舉

酒相屬曰樂矣哉公之遊乎殆不可以無記遂書而
貽之

陸通志

歷城縣志卷第七

歷城縣志卷第八

山水考三

水一

大清河古濟水故瀆也西北起自齊河縣界東北至濟陽縣界經縣境凡七十五里詳見後

導沈水東流為濟入于河溢為滎東出于陶邱北又

東至于蒗又東北會于汶又北東入于海

禹貢

濟水在齊界為齊濟

春秋經傳集解

濟水過郡九濟南

漢書地理志

王莽之世川瀆枯竭濟水便入于河不復絕流而南

其餘流自東平以東北者皆謂之清水

水經注

今東平濟南淄川北海界中有水流入於海謂之清
河實荷澤汶水合流而曰濟河蓋因舊名非本濟水

也

通典

全節縣濟水在縣北四十里

元和郡縣圖志

濟水通得清水之名以水道清深也

王應麟玉海

羅泌辨兗濟北濟既久於河性與河別不能合混滲

漉入地伏行達陽而遂溢為滎耳今之歷下等處發

地悉是流水濟所過也

史略

明昌五年春正月尚書省奏都水監丞田櫟同本監

官講議黃河利害嘗以狀上言前代每遇古堤南決多經南北清河分流南清河北下有枯河數道河水流其中者常至七八分北清河乃濟水故道可容三二分而已今河水趨北齧長堤而流者十餘處可於北岸墻村決河入梁山灤故道依舊作南北兩清河

分流

金史河渠志

濟南行記甘露園紀歷下泉云夫濟遠矣初出河東王屋曰沅水注秦澤潛行地中復出共山始曰濟故禹書曰導沅水東之逾溫道墳城入於河溫為滎狀於曹濮之間乃出於陶邱北會於汶過歷下灤水之

北遂東流且濟之為瀆與江淮河等大而均尊獨濟水所行道障於太行限於大河終能獨達於海不然則無以謂之瀆矣江淮河行地上水性之常者也濟或狀於地中水性之變者也予愛其論水之變與常有當於予心者故并錄之

遺山集

大清河古濟今汶水經注濟枯渠注巨野澤澤北則清水巨野今梁山泊也北出為清河古自壽張縣安民亭合汶水今開清水南導任城則濟清不入汶汶

自行古清河矣

齊乘

歷城有大清河在西北即濟水故道自壽張縣流經

縣界東北至利津入海

明史

濟水在漢時狀流不見惟汶水自泰安州出者由故道東北流入海自元人引汶水入洸為運河國朝因之凡汶水入海處皆築堰壩以遏其流而入海之道遂多湮塞今所謂大清河者乃汶水出洸河者復從張秋分流而入會齊東南諸山泉溝澤北經長清齊河至歷城會灤水

陸通志

大清河自元時於寧陽縣東築堽城壩遏汶水入洸以通運河國朝永樂間入於東平州東築戴村壩盡遏汶水入會通河於是入海之道多塞汶水既入運

河者又從張秋分流復由故道會諸州縣溝泉之水

合小清河東北注海

同上

劉珣大清河記畧惟青濟之區有河曰大清河曰小清
小清之源出於歷城之趵突泉中滙清深孝婦諸泉
東北抵樂安高家港達於海大清則濟水源也自東
阿之張秋東北抵利津富國鹽場達於海往來舟楫
浮於二河鹽商徧於齊魯諸道水利鮮與為儼自永
樂初以來堙塞不通水失其經一值天雨茫茫巨浸
壞民田廬弗以數計成化癸巳冬叅政唐源潔分巡
海右言於巡撫左僉都御史牟公曰今二河為患守

土諸君子以頻年饑饉民不任勞為辭彼不知救荒之中有可以興利者役民之中有可以濟民者患而不知為政惡在其為民父母也疏河之責某請當之敢告都憲公曰事當預圖斯無患即率屬理之無食之民食之而役之廢上下兩得吾知若必能辦此其行之無惑源潔遂躬任其責焦勞靡寧擁節宵征相視地形命水工準高下自歷城濬堰頭入至樂安小清通矣自張秋濬至平陰之滑口大清通矣大小清既通水循故道退出鄒平等邑膏腴可耕之田數萬頃民用大悅其河內備淺又置豬水閘防溢置減水

開閘傍各鑿月河總二十有八濬通水路五百二里
所役即無食之民當賑者每人日給米三升錢五十
文民凡五萬七千五百四十名米一萬六千五百五十
石錢一百九十八萬四百文復慮倉廩空竭措置戶
口鹽五萬引俾諸商得銀一萬八千餘兩易米以
補前米易錢以補前錢仍以鹽之羨利為一切傭工
造閘之費是役也財不出於官不取於民而濟青之
善利以完青船入於濟濟船入於張秋東西轉輸之
人大稱曰便以甲午二月始至十月功成厥功既成
都憲公為疏源潔修河之勞於朝公卿大夫罔不稱

善珊東人尤善之曰經理山川古聖賢第一功也早
不災饑不困萬世之計也夫二河之利本天地自然
之利有司一則窘於堙塞一則迫於歲饑若終不能
為者賴都憲公獨知遠覽得於形器之上源潔踐履
沮洳出乎拘俗之表預定事機多方設法既息小清
之患并通大清之波二河如一水之周流斯民歷年
荼毒盤剝之苦一旦告除譬之陰霾積月人方憂鬱
豁然青天白日而其歡欣鼓舞之情自不能已況於
救荒之中克除百年之患以經畫之餘開無窮之利
非所謂萬世之利而何哉史曰未事先圖未試先知

都憲公有馬語曰可勞而勞可利而利源潔以之於
乎彼規規於一時者固不足言也爰是濟青父老走
書於珣曰子職史事茲都憲大叅二公深恩偉績有
利於吾藩如此子苟辭為文珣乃記其凡俾歸刻於
石非徒永二公之感亦將以啟夫後之官於斯者匪

曰佞也

舊志

甘一驢鹽河議國初山東鹽河有東北二大支其北
一支箭灤口蒲臺二批驗所為大清河灤口上流自
東平坎河口東阿平陰長清而東入灤口下流經蒲
臺濱州霑化利津入海以通寧海永阜豐國永利利

國豐民王家岡等 運鹽出入鹽過蒲臺濊口二關

可達運河北鹽河北一支

岳通志

甯河僅存者北一支大清河耳濊口為大清河下流齊東縣間有淺處尚無堙塞蒲臺而下通行濱州利津霑化入海大清上流自坎河口禁而鹽舟不達於運河至魚山車運三十里上船而商人始告病矣運河之水涓滴不入鹽河加以連年旱乾商人捨舟從陸而大清又幾廢矣幸蒙廟堂採議濬五泉建五閘以復大清之舊以通寧海等八鹽場之利不獨山東舊額五萬兩賴之即梁宋新額一萬六千兩亦取辦於

此矣但徃以十九場而應全齊梁宋今以八場而應全齊梁宋源少流濶恐不可繼明問欲舉鹽河故道而盡復之誠盛心也

同上

濟水自東平以下唐人謂之清河至宋又有南北清河之名南清河即泗水北清河即濟瀆南渡後北清河又有大小之分蓋自劉豫導濬東行始齊乘以大清河為古濟水小清河為豫所創志家皆沿其說黃子鴻非之曰以水經注元和志寰宇記諸書考之濟水最南漯水在中河水最北今者小清河所經自歷城以東如章邱鄒平長山新城高苑博興樂安諸縣

皆古濟水所行而大清河所經自歷城以上至東阿
固皆濟水故道而自歷城東北如濟陽齊東青城諸
縣則皆古漯水所行蒲臺以北則故河水所經蓋宋
時河常行漯瀆及河去則大清兼行河漯二瀆其小
清所行則斷為濟水故道也渭按子鴻此論足正三
百餘年積傳之謬蓋清河所行本濟漯不知何時從
歷城東北決而北入濟陽界與漯水合而清河之名
遂被於漯據水經漯水經著縣故城南著即今濟陽
而縣南有大清河是知大清即漯其水自歷城入濟
陽乃近世之所決非唐清河入海之故道也濟陽之

流日盛則章邱之流日微故劉豫堰濬水使東以益之其所行者實濟水故道也而志家反以濟陽之大清河為古濟舛錯殊甚不有子鴻其誰正之然大清自歷城入濟陽及濱州以東入海之道不知決於何年意者宋熙寧時河嘗合北清河入海始開此道其後金明昌五年河復由此入海久而後去流益深廣此大清之所以浩浩而小清之所以屢濬屢塞也與

胡渭禹貢鉅指

杜佑云清河實荷澤汶水合流非本濟水而志家猶執清河以為禹貢之濟水不亦過乎或又云山左諸

泉皆濟水溢為大小清河濟雖絕而不絕也然此等指為濟水則可以是为榮澤陶邱之遺跡可乎哉東漢後河南無濟水斯為定論紛紛筆舌徒滋來學之惑無謂也

金明昌五年河決陽武故隄灌封邱而東注梁山灤分為二派北派由北清河入海南派由南清河入淮而汲胙之流遂絕

自金明昌甲寅之徙河水大半入淮而北清河之流猶未絕也下逮元世祖至元二十六年己丑會通河成北派漸微凡九十六歲及明宏治中河決衝張秋

劉大夏築太行隄以禦之而北流遂絕

以上俱禹貢雖指

今之大清河乃自平陰縣南之柳溝諸泉由東平州

北門外過西折而東北夏秋運河泛漲則張秋迤南

東岸有減水閘分流來合而東北出

此即今鹽運所經鹽船自濰口

故開由大清河而上泊於魚山又南則由河渠至於東平西則由小鹽河至於張秋故大清河有鹽河之

名一方
史紀要

大清河在長清縣界右納縣之麻峪水水源出長城嶺

下西北流經五女石南又西北右會花灘水水源出拔

山東西北流經拔山北左會拔山山西之水又西北經

棋子嶺南左會麻峪水為三岔灣兩水之在縣境皆可

十五里也又西北入長清界

按麻峪水疑卽水經中川水之一源也以在縣界者僅十餘里故不詳叙

大清河又東北於長清縣界右納縣之玉水

濟水又東北會玉水

水經

玉水導源泰山朗公谷谷舊名琨瑞溪亦謂之琨瑞水其水西北流經玉符山又曰玉水又西北經獵山東又西北枕祝阿縣故城東野井亭西故俗謂是水為祝阿澗水北流注於濟

水經注

長清縣玉水自歷城縣東南流入縣境

太平寰宇記

玉水以玉符山得名見水經及注今名錦陽川又名南川源出長城嶺仙龍潭又西北左納礦洞溝水又西北右納勞米峪水又東北經宴仙駝東右納燕子臺水又西北右納勞灘水又西北右納屈曲峪水又西北經馬頭山南又西北右會龍門峪水又西經小會莊南又西經人會莊南又西經琨瑞山神通寺南神通寺初名朗公寺故又名朗公谷也

玉水東西分流山中人云西發趺突東發百脉驗之信然謂徑入濟者誤也

齊乘

按此說不可信詳見後

名泉碑曰汝泉在神通寺內曰龍門一名龍泉在通
迎寺東曰染池在龍門東曰都泉在中宮東南曰莖
在柳鋪東

同上

錦陽川在中宮東南延袤六十餘里或以雲林競秀
或以山水呈奇天開畫圖劉函山有詩

志

龍門峪在柳埠東延袤四十餘里名泉三十餘泓
鎗桿泉在南桃科泉飛滋圃為龍門諸泉之冠流入
錦陽川

獨孤泉在天麻嶺下北流入錦陽川

枯泉在桃科嶺南流入錦陽川

龍門泉在神通寺東一名龍泉洞門半掩石龍半露
水自中出流入錦陽川

染池泉在神通寺東流入錦陽川

菩薩泉在南菩薩菴石崖下大旱不竭大澇不溢流
入錦陽川

滴水泉在神通寺東峪其流入錦陽川

海螺峪在神通寺東

錫杖泉在海螺峪內流入錦陽川

南薄羅泉在齊王寨後巖下

湧泉在神通寺西瀑布飛懸流入錦陽川

汝泉齊乘曰在神通寺今按寺中本無泉惟方丈西有白龍池或即汝泉與

以上俱舊志

金城通聖橋記畧由岱宗而北百餘里有寺曰神通後秦時建山川靈鬱殿宇恢宏諸澗之水滙自良維迤邐向坤而逝舊有石梁名曰通聖僧殘寺圯碑碣就荒歷宋迄元漸次興復四臺卓立雙塔歸然迨我皇明名僧逸衲往往棲止然燈演法高閣鳴鐘亦一時之邁會也但橋廢未興興情未愜比丘覺滿卓錫於茲慨然以興造為任精修苦行誠積動人十方君子競相施助經始於嘉靖丙辰春正月落成於丁巳

春三月橋凡三孔縱六十餘武橫半之計其費石以
萬計土以千計金以百計遂使千載之廢一朝崇興
余聞在昔朗公實始開山海公龍公雨公興公繼之
先叔瑄公續緒靈巖宣暢宗青滿也禪誦有年懸悟
心印請記於余義弗可讓聊述夙因用章聖果云碑
高瑾錦陽川道中即事詩長橋漠漠陰崖下野草萋
萋古寺邊柿葉正青秋未老行人指點錦陽川籍青書屋

玉水又西南經金驢山西左會窩舖峪水水源出松尖
山龍王崖下龍潭北經雙鎖山西又北經紅山口西右

納三岔水又北經靈鷲山東左納東勞溝水又西經九
塔寺北又西經金驢山南右納齊城峪水水源出姜榆
樹冰冰泉北經白石崖西右納袁洪峪水又北左納茶
臼河水又北左納避暑泉水又東北經城子頂南右納
苦洪峪水又東北右納段華泉水又北經齊城山東又
北經靈鷲山西右納聖水泉水左納康泉水又北經回
龍山西入於窩舖峪水窩舖峪水凡行二十餘里北會
於玉水

窩舖峪在柳埠東南有永興觀

舊志

陡峪在交戰頂東徧谷丹楓秋老更韻

牛欄峪在螭蟠谷東北

齊城峪在柳埠南逶迤三十餘里名勝殊多

冰冰泉在岱陰鞦韆臺山高陰寒冰積如陵故亦名
冰冰臺相傳岱北有頑冰即此其冰立夏始解北經
龍峽入茶臼河

响泉在交戰頂西谷下

袁洪峪在柳埠東南幽如盤谷泉石花鳥不可勝記
苦洪峪在袁洪谷北趙官峪袁洪峪南內有清流
琴泉在苦洪峪北泉聲滴夜如理絲桐齊乘謂泉甲
天下韻琴筑而味肪醴聽此益信

苦苣泉在柳埠東南袁洪峪內一名萬苣泉源偏僻
有萬壑爭流之概流入茶臼河

茶臼河在齊城峪中源出袁洪峪及冰冰臺北流入
錦陽川

試茶泉在茶臼河東壁上其流飛瀉入茶臼河

避暑泉在萬苣西南泉于峪西北入茶臼河

段華泉在九峪寺南

康泉在齊城峪流入錦陽川

以上俱
舊志

玉水又西經屏風山南又西經柳埠南又西經摩天嶺
南又左會梨峪水水源出嶽麓臺下東北流右納石灰

溝水又東北右納捺池水又北右納淤泥泉水又北經三角洞東又東經王府崖東右納閭家河水又西北經齊城西又北經觀音洞東又北右納石棚谷水又北經龍岡嶺東凡行二十餘里來入於玉水

名泉碑曰熨斗在梨峪門家莊

齊乘

梨峪在柳埠西南兩山一水延袤三十里南抵長城

舊志

印度泉在梨峪龐家莊

同上

閭家河在梨峪中源出印度泉流入綿陽川

同上

玉水又西經石棚崖北又西左納石棚谷水又西經扶山

北右納都泉水

張家峪在柳埠北

補志

鹿鈞泉在都泉東北

醴泉在四合寺內

都泉在中宮東南皇姑寺溪抱村流為溪北諸泉之總

水簾泉在都泉西南石崖下一名水簾坡錦陽地多

滲漏非此水助流將不免為乾壑矣

以上俱補志

玉水又西北經總度口莊南左會錦雲川水錦雲川一名西川水發源於長城嶺之陰西流北折至核桃園又

北流西折經東棋子嶺北左會西棋子嶺之水於黑山
寨下名山山溝出山溝一名出泉溝又西北經南高二
莊南右會南高二莊東之水又西屈而東北流左會百
花泉水水發源於西南山中東行經閣老頂南又東為
春木關峪又東南經孫家崖南又東會錦雲川水錦雲
川水又北左納雙泉水折而北右會紫子峪水又西經
北高二莊北折而北左納紫子峪水又東經邢家莊南
屈從其東折而西經伊家莊南屈從其西又北經扶山
西方山寨東又西北至尹家莊西左會南道溝水水發
源於火焰山天麻寨之間北行經三媳婦寨東又東北

經乃山寨西又東北經普門寺東會於錦雲川錦雲川
水又西北出東西兩羅家園之間而東北注於玉水自
長城嶺至此可四十餘里

錦雲川在中宮南一名南川延袤六十餘里山川爭

秀與錦繡錦陽鼎踞其勝云

舊志

湧清泉在澇峪東石崖內流入錦雲川

孟家泉在澇泉東

澇泉在澇泉嶺後

雙盆泉在高兒莊石崖下泉泠泠自盆出其味甘流

入錦雲川

聖池泉在普門寺山門外清冽澄潔一方攸賴
熨斗泉在扶山子房菴

上水泉在楊家寨後泉氣陰森沁人肌膚

以上俱舊志

王水又西經太甲陵南又西北會錦繡川水於太甲陵
西為黑水灣

錦繡川水源出梯子山雲梯澗西北流經南將干莊之
東右納紅泉峪水左納凍凍峪水又北經赤草嶺東右
納石屋峪水又東北左納胭脂泉水又東北右會連陰
棧水水發於連陰棧下西北行十餘里來入於錦繡川
水

錦繡川水又東北經龍集山東右會藕池水水源出天羅頂下西北經算盤莊北屈經螃蠏嶺南又西北名礮槽河凡行十餘里來入於錦繡川水

錦繡川一名北川延袤六十餘里泉石之勝疊見層

出劉禹山所著集強半咏北川風物

舊志

錦繡川在中宮東夾澗芍藥叢生春時絕勝

府志

錦繡川亦名中宮河下流入長清縣即水經注之玉

水也又有錦陽錦靈二川畧相聯屬

大清一統志

按錦靈據舊志當作錦雲

錦繡川水又北經西營莊南右會雲河水水源出東南

山中北經皇寨南右納天井峪水又西左納羊角峪水
又西右納漬米峪水又東南經羊皮嶺至西營莊南凡
行十餘里來會於錦繡川水錦繡川水自梯雲澗至此
幾二十里

雲河在擒口峪北源出漬米黃樞等泉流入中宮河

舊志

苦梨泉在黑牛寨前黃尖下流經羅伽峪入雲河

天青峪在漬米峪東

漬米峪在皇寨谷南

鴨泉在漬米泉東流經西營入雲河

清米泉在清米峪內流入雲河

胭脂泉在玉泉寺嶺前

螃蟹峪在西營東甘泉數泓匯為清溪

黃櫨泉在西營北雲河一帶之水大半仰給此泉其
流經擒口峪入錦繡川

玉泉在龍集寺觀音閣下涓涓東注龍集獨勝以上俱舊志

錦繡川水又西經虎頭崖南右納龍灣水水源出大澗
嶺南之龍灣西南流右納核桃泉水又西南經十八盤
東又南經石嶺西又南經虎頭崖西凡行十八里來入

於錦繡川水

錦繡川水又西經桃花嶺南右納大黑谷水又西北左納擒寇峪水水源出孤峯巷西北流折而東經大龍道南又東北經小龍道東來入於錦繡川水

擒寇峪在雲河南林木蒼蔚

舊志

錦繡川水又北行經西巖東又西北經石屋灣東又西北右納鐵角嶺水水源出鐵角嶺南南經青石崖東又南經石門東凡行七八里來入於錦繡川水

錦繡川水又西北經馬頭山北左納白雲泉水又西經白雲洞北又西經青頭山南又西經又家莊東南右納

車川峪水錦繡川水自西營至此可三十里

錦繡川水又西北右納黃精峪水又西經林泉觀南又西經少微莊南又西經琨瑞山北左納馬蹄峪水又西北經香孤山南又西右納大佛寺水又西左納南孤山水又西南左納北水峪水又西南經八達嶺南又西南左納張家峪水又西右納赤家峪水又西南經鳳凰臺北又西南經安陵王墓南左納稻池水又西經火龍寨南又西南經紅山南又西北右納鐵角嶺後之水水源出鐵角嶺西北又西南經青頭山北又西北經老魔窟北又西南經八達嶺北又西南右納大汭峪水又西南

經紅山西凡行三十里來入於錦繡川

名泉碑曰懸泉在中宮東曰柳泉曰車泉在中宮東

遠東莊齊

水峪在馬蹄峪東內有三教堂清幽莫匹

舊志

琵琶泉在黃泥溝東北泉出石間泠泠有韻流至孤

山入錦繡川

馬蹄峪在南泉寺東澗壑幽邃流水無聲有桃源之

勝水入錦繡川

寶姑泉在大佛寺北頂

以上俱舊志

錦繡川水又西經中宮鎮南又西經太中陵北入西角

會玉水於太甲陵之西

永濟橋在中宮鎮

舊志

玉水又西南經玉符山北右納狼窩溝水水源出兩仙嶺東西南流屈經蛟龍山西又西南經中宮鎮北又西南經娘子山東又西南入於玉水

玉水又西左納魏花寨水又西右納娘子山西之水又西左納帽山西之水右納平房莊水又西北左納東許家莊水又西北左納老仙嶺水又西北右納孟家泉水又西經卧虎山南又西北右納兩仙溝水水源出南北兩仙嶺之間西南經石匣山南又西南經石固寨南又

西南經黃山東又西南入於玉水

玉水又西北左納草溝水又西北經黃山渴馬崖南水
經冬則伏於此崖之下夏秋則見曾南豐云泰山後與
齊東南諸谷之水西北匯於黑水之灣又西北匯於柏
崖之灣至於渴馬之崖則泊然而止狀流而東發趵突
泉即此地然西北流者至嶺山北復見經長清縣之獵
山西又西北自長清縣界入大清河玉水自中宮至渴
馬崖西入長清界可二十五里

大清河又東北於齊河縣界經丁家道口南入縣界又
東北經馬家道口南又東北經藥山北右納富家溝水

水分自柳塘河詳見灤水下

丁家道口在馬家渡西馬家道口在尚家林西尚家林渡在灤口西蘇家渡口在灤口東

舊志

大清河又東北經鵲山南右納灤水名灤口見水經注金史歷城六鎮之一也明設濱灤分司於此今有批驗所分上中下三關封閉有定期以驗鹽引也灤水源出縣城西南里許一名爆流泉又名趵突又名檻泉或曰濟水之旁出者或曰非也蓋伏陰諸水伏流所發泉有三匯為池其上有橋名來鶴金線皇華柳絮卧牛東高諸泉自東來注之漱玉無憂石灣酒泉湛露諸泉自南

來注之登州望水諸泉自西來注之夏秋淫雨則東南受歷山後七里磴之水恒有水災

濟水又東北灤水出焉

經水

灤水出歷縣故城西南泉源上奮水涌若輪俗謂之娥姜水湖水引清東入西郭東至歷城西而側城北注湖水上承東城歷祀下泉源競發其水北流經歷城東又北引水為流杯池州僚賓燕公私多萃其上分為二水右水北出左水西經歷城北西北為陂謂之歷水與灤水會自水枝津合水首受歷水於歷城東東北經東城西而北出郭又北注灤水又北聽水

出馬濼水又北流注於濟謂之濼口也

注水

按水經濟水又東北濼水出焉注云出歷縣故城西南則齊乘謂源曰趵突流曰濼者誤也又云其水北為大明湖則大明湖自在城西南蓋濼源左右前後發地皆泉其緒為湖即去濼源泉不遠今此地半為衢肆蓋後人築土水中為之耳求其地而不得乃以今城內之湖當之其誤蓋自金元以前矣又云水引瀆東入西郭東至歷城西而側城北注猶與今水道相合人云湖水上承東城歷祀下泉源競發其水北流經歷城東蓋是時歷縣故

城甚小其地不過今城三分之一所云左水西經
歷城北西北為陂此則宋以後所稱為大明湖者
下方云謂之歷水與濼水會則二水皆在當日之
城外明矣又云又北聽水出焉聽水自注巨合水
入濟水經注甚明齊乘以濼之下流名曰响河者
當之非也又曰濼水又北流注於濟謂之濼口至
今猶然此西流也方輿紀要以濼水舊合大清河
處在華不注山東北此東流也辨又詳見各條下
濼水在縣西南二百步

太平寰宇記

古說濟水伏流地中今歷下凡發地皆是流水世傳

濟水經過其下

沈括夢溪筆談

濟南行記瀑流泉在城之西南泉灤水源也山水匯於渴馬崖狀而不流近城出而為此泉好事者以穀糠驗之信然往時漫流纔沒脛故泉上湧高三尺許今漫流為草木所壅深及尋丈故泉出水面纔二三寸而已近世有太守改泉名檻泉又立檻泉坊取詩義而言然土人呼瀑流如故瀑流字又作趵突曾南

豐云然

遺山集

金線泉有紋若金線夷猶池而泉今為靈泉菴道士高生妙琴事人目為琴高留予宿者再進士解飛卿

好賢樂善款曲周密從予遊者凡十許日說少日曾
見所謂金線者尚書安文國寶亦云以竹竿約水使
不流出或見之予與解裴田泉上者三四日然竟不
見也

同上

凡濟南名泉七十有二爆流為上金線次之珍珠又
次之若玉環金虎黑虎柳絮皇華無憂洗鉢及水晶
簞非不佳然亦不能與三泉侔矣此游至爆流者六
七宿靈泉菴者三

同上

灤水源曰趵突流曰灤東導曰小清今府城西平地
泉源噴湧雪濤數尺聲如隱雷

齊東

歷下名泉碑有曰金線在趵突東曰皇華曰柳絮曰
卧牛在金線東曰東高曰漱玉在金線南曰無憂曰
石灣在趵突南曰酒泉曰湛露在無憂西曰登州曰
望水在萬竹園內

同上

曾南豐二堂記云云蔡氏援此以證濟水之伏破程
氏之論當矣又取沈存中筆談謂歷下發地皆泉濟
水經過其下自相矛盾何邪且古濟行清河如在井
底南仰泉源遙在山麓豈龍相及今黃山渴馬崖水
伏而可證又龍洞山中謂公谷諸水東西伏流土人
云西發趵突東發百勝驗之信然蓋歷下衆泉皆伏

陰伏流所發西則趵突為冠東則百脉為冠地勢使然何關於濟存中得之傳聞九峯按圖索驥容有疑誤近官濟南者遂定以濼為濟建濟瀆廟於泉上謬矣

同上

鄒道元謂濟水在王莽時枯竭鄭樵通志亦曰濟水多涸竭自今觀之濟水勁疾能穴地伏流隱見無常乃其本性非真涸竭也濟水既伏流地中則發地皆泉又不特歷下諸邑為然是故一見為濟源再見為泉水又見為山東諸泉水而溢為大小清河其實皆濟水也又何嘗見其枯竭耶

陸通志

趵突泉濺水之源也一名爆流此泉在春秋已顯蓋
岱陰之水發為此泉平地泉源盛涌三窟突起雪濤
數尺聲如隱雷冬夏如一固寰中之絕勝也景標為
趵突騰空或又題為第一泉

舊志

金線泉在城西南趵突泉東北石甃方池泉源亂發
澄澈見底南北有金線一道隱浮水面流經來鶴橋
入趵突泉

匯川橋在趵突泉東山水溝

皇華泉在金線東小巷內一名才魚泉流入趵突

柳絮泉在金線東南角泉沫紛翻如絮飛舞

以上俱舊志

詩大雅盛沸檻泉維其深矣傳云檻泉正出涌出也
李廵注爾雅口水泉從下上出曰涌泉皆水之軼出
地中而無上流來處者阿井趵突其類也

禹貢
維指

東坡忠泉詩云茲山定空中乳水滿其腹遇隙則發
見臭味實一族余謂濟水亦然今年遊歷下觀諸泉

尤信

同上

朱善觀趵突泉記畧善少從先父授書讀禹貢注趵
突之泉已稔聞之今偕廣文薛正言從事崔思成即
其所而觀焉是時天氣嚴寒水脉微細而斯泉涌出
猶高二尺許則春夏之交其高數尺曾氏之言信不

誣也泉外碧波澄澈金沙明瑩柔荇漾青碧藻搖翠
長莖纖葉綽約靡靡余三人臨流俯觀久而忘倦正
言復命二生挹泉煮茗以飲清氣入於肺腑飲訖循
流以觀則又知斯泉交灌於城中浚之而為井瀦之
而為池引之而為溝渠匯之而為沼沚缺者如玦圓
者如環縈者如帶噴者如霧激之而鳴者如金石絃
竹之聲隨地賦形不可殫記誠濟南之奇觀也洪武
戊午十二月某日豐城朱善記

一齊文集

施閏章趵突泉來鶴橋記山川之美靈異之區大夫
士庶人羣萃而遊者匪耳目之娛所以望雲物節

勞逸蕩滌心志也。事有堙廢以時修舉，吏用盡職上
下以和濟。南多名泉，而趵突泉最顯。源出河東王屋
山，為沅水潛行地中，集伊婁見數千里而出於歷城
之西南三穴，觴沸高數尺。水經注所謂水涌如輪者
也。流為濼水，達於小清河，以入於海。其上為仙宮禱
雨著異。其橋曰來鶴，跨泉之南。其樓榭亭館之美，爛
若霞起。賓燕咸集，憑欄川瞻仰而見山之青，俯而見
泉之潔，且駛側耳靜聽，蓋未嘗不喟然興歎。浩乎其
有得焉。壤居都會，羣兒裸浴飲馬，蹂踐沙石，阻淤向
所稱涌起數尺者，今僅尺許。又其橋材弗良，旋構旋

北遊人惴惴失墜臨觀不懼監察侍御程公來按是
邦布令流膏修舊舉廢既數月過泉上詫曰何泉之
昔壯今弱也亟出俸錢命浚之閭章為之經始上自
中丞許公及藩臬郡僚諸大夫咸有助於是疏壅決
滯所去沙石成邱劍拔雷轟復泉之舊召工師詢橋
材對曰柳可三年榆槐可十年松杉可數十年杉為
上然南產也其直數倍吾為其難且久者遠橋以杉
施丹塗漆輔檻以甌橋下橫置聯鎖飲馬者不得至
禁民毋褻污凡楔栝垣甍之類缺漫漶者皆治而新
之又為橋於漱玉亭前三月落成齊人踴躍來觀咸

謂其事舉工速同吾樂而不吾役也為之歌曰清流
激湍兮孰濬其源潛蛟出蟄兮飛虹蜿蜒又歌曰宣
鬱導淤澤用不衰選材濟危功用不隳君子戾止飲
酒燕喜小人忭舞歌此樂土聞章聞而異之此泉上
之歌也而可得為政之道焉是可以書侍御公命紀
其事爰刻石以告後之吏斯土者

愚山集

二十二日快晴次郡城觀於趵突泉疎林清樾涼颼
襲人自亭東經來鶴樓北度石梁灤源清澈可鑒毛
髮檻泉凡三濺珠噴雪仰出二尺許蓋開先之瀑奇
於縣出而此泉奇於正出也予嘗過明水之百脉泉

方塘綠淨清不掩鱗即緇江發源處與此泉足相甲

乙然此在通都彼淪荒僻遇不過何其遼哉

王士正
泰別辭

程後
記

曾鞏趵突泉詩一派遙從玉水分晴川都灑歷山塵
滋榮冬茹溫嘗早潤澤春茶味更真已覺路旁行似
鑑最憐沙際湧如輪層城齊魯封疆會況託娥英託

世人

南豐
類稿

金線泉詩玉甃常浮灝氣鮮金絲不定路南泉雲依
美藻爭成縷月照靈漪巧上弦已繞渚花紅灼灼更
縈沙竹翠娟娟無風到底塵埃盡界破冰綃一片天

同上

趙孟頫趵突泉詩
灤水發源天下無
平地湧出白玉壺
谷虛久恐元氣泄
歲旱不愁東海枯
雲霧潤蒸華不注
波濤聲震大明湖
時來泉上濯塵土
冰雪滿懷

清興孤

松雪集

張養浩趵突泉詩
物平莫如水
煙阻乃有聲
云胡在坦夷
起立若紛爭
無乃滄溟穴
漏洩元氣精
不然定鬼物
搏激風濤驚
竒觀天下無
每過煩襟清
茫茫彼區域
載物良不輕
微水坤焉浮
非天水奚生
孰知一脈許
而與天地并
因之有真悟
日晏忘濯纓

頤嗣立元詩選

趵突泉詩統欄驚視重徘徊流水緣何自作堆三尺
不消平地雪四時嘗吼半天雷深通滄海愁波盡怒
撼秋濤恐岸摧每過塵懷為瀟灑斜陽欲沒未能回

舊志

王守仁趵突泉和趙松雪韻樂源特起根虛無下有
蒼窟連蓬壺絕喜坤靈能爾幻却愁地脉還時枯驚
湍怒湧噴石竇流沫下瀉翻雲湖月色照衣歸獨晚
溪邊瘦影伴人孤

胡績宗咏趵突泉詩王屋流來山下泉清波聊酌思
泠然雲含雪浪頻翻地河湧三星倒映天滾滾波濤

生海底。茫茫蘼蕪散城邊。秋光一片凌霄漢。最好乘
槎泛斗前。

王廷相飲趵突泉詩。濟水東來伏泉開。湧玉林恍疑
焦釜沸。翻訝石堂沉。作澤隨雲遠。成波助海深。春回
潛躍遂。鬱有羨魚心。

葉冕飲趵突泉詩。一脉原從天上來。翻濤如怒震如
雷。千年玉樹波心立。萬疊冰花浪裏開。神液暗分天
地髓。靈光常護水晶臺。飛龍有日還收去。散作甘霖
徧九垓。

晏壁柳絮泉詩。金線池邊楊柳青。泉分石竇曉泠泠。

東風三月飄香絮一夜隨波化綠萍

望冰泉詩萬竹園中景趣幽雙泉一脈望登州碧梧
百尺棲丹鳳雪浪千堆戲白鷗

光廬灤源飲邊一丈詩尋幽到灤源相對倒金樽嵐
氣連城白泉聲入夜喧綈袍知已在華髮故交存醉
矣霜天曉依投月下門

以上俱
舊志

申涵光與殷伯巖傳掌雷飲酌突泉上有懷邊李諸
公詩近郭傳靈瀨飛花漫石灘影翻孤閣大聲助暮
秋寒見月頻呼酒懷人忽倚闌昔賢遊覽地指點問

黃冠

中見
盟集

馮溥題趵突泉兼懷李滄溟詩白雪樓何在空傳趵
突泉一泓珠散彩數尺玉浮烟噴薄蛟龍怒光瑩日
月懸當年餘翰墨憑弔意茫然

任山堂集

吳偉業趵突泉詩二首似濤懸何處飛來絕壑風伏
流根窈渺跳沫拂虛空石破奔泉上雲埋廢井通錯
疑人力巧天地桔槔中

不信乘空起憑闌直滅衣池平難作勢石隱定藏機
曲水金人立凌波玉女歸神魚鱗甲動咫尺白雲飛

梅村集

施閏章趵突泉詩勞生慚物役越郭就臨眺澀澀涌

寒泉淵淵發地竅天吳翠旂翻白龍長尾掉荇藻冬
青慙雪月宵照耀狀流王屋來澄觀一清嘯逝者恨
如斯素心愜從好停策漱潺湲盪胸歸要妙

愚山集

趵突泉送嚴子餐都諫北還詩

時主考山東

傳聞此泉來

王屋伏流倒涌歷山麓寒光噴雪後飛雲大聲奔雷
小碎玉故人黃門天上來崔嵬百尺龍門開憑凌日

觀照滄海咄嗟坐嘯生風雷臨流復有千尋閤白雪
聲名赫如昨黃門揮翰似青蓮更擬新篇致康樂為
君開尊握君手素心海內正良友年將強仕相伯仲
忍使離居成皓首扁舟昨日明湖游驪歌今日生離

愛君不見七十二泉皆在眼那堪溝水東西流

同上

葉承宗釣突泉詩齊門有暇人生長樂源里閑水識

形勢探源得神髓奇瀾激三峯海上神山似峨眉雪

恒翻廣陵潮未已車輪湧不停珠樹紛相峙瀑蜚月

亦碎濤壯風難靡靈窟漱寒玉餘波搖紋綺冬泉沂

水溫香味中冷美緣幻領奇態臨喧悟靜理奔流引

曠懷清響砭塵耳豈必溪畔茶

泉旁原

有茶樹但飲波心水

定能浣俗腸居然英多士

集源

王士正秋日遊釣突泉詩層臺陰華池蕭晨展遊眺

明玉何亭亭水泉復瀟瀟岱陰多伏流樂源更清峭

誰能結漁菴坐學桐廬釣

漁洋集

來鶴樓觀釣突泉詩二首南郭山泉好登臨復此樓
碧晴諸岫雨綠淡一泓秋曉日浮沙磧明玕出靜流
翳然林木處吾意已滄洲

峯巒疑印渚魚鳥即華林曲閣清暉集方塘積翠深
伏流生急雪驚瀑起文禽坐覺微風寂朱絃空靜音

阮亭紀年詩

田雯釣突泉歌十年不到釣突泉今夕觀泉頗跌宕
乍聽只疑地肺坼坐久如聞江鼉漲澄泓一池竹樹
深吞納千溪亭榭曠馮陵叫嘯衆山響迸落簷花劈

高浪白蟭道士前致辭七十二泉各殊狀獨有趵突
絕神奇王屋倒瀉夸娥創崩裂不聞海髓乾噴薄直
從石竅上軒轅張樂列笙鏞白蛺蝶掉尾飲甕盎樂源
百脉皆湫流此水不知安歸向鵲華屹立四扇開面
面諸峯作屏障我聞道士說泉源壺埽除神色王
岸幘振翮思騫騰如御樵風吹五雨錢塘勁弩射潮
回廣陵夜雨聽濤壯况自千佛巖頂歸春風綠酒供
行帳波紋凌亂藹藹出山脚斑駁桃花放及到此泉
已昏黑泠泠月色照衣桁有客登樓蹋白雪何人吹
笛送高唱陂陀犖泥路滑橋邊一鶴行相傍

盛楓杓突泉詩造化周大運百川有廻狀孕靈忽噴
薄紫紆亘地軸側聞濟水源東來發王屋或溢為狂
瀾或止為平陸斷續倏異名一氣隨往復我來歷城
下泉光炫人目三峯正玉立撼瀉珠千斛林泉鑑澄
徹壁面疑新沐梨葉墮嚴霜三秋令始肅高閣寒逾
峻晚雨露霖霖俯視奔湍駛餘聲振萬木上有神仙
踪下有魚龍伏所愧勞行役踽踽怨窮獨流光掣飛
電寄生如信宿安能棄人事挂瓢遂初服

海業集

宋廣業杓突泉詩名傳歷下冠諸泉王屋尋源豈偶
然倒捲銀濤凌碧落紛飛雪浪破蒼烟恍疑湧地分

三峽直欲乘風上九天。幾度來看嘆奇絕。塵心盡滌

若神仙。

李師白續縣志。以後俱稱續志。

蔣景和再觀釣突泉歌。釣突泉勢正奇。九體物賦象難尋求。灤澗名義徵春秋。分荷別濟誰窮搜。我疑濟性最疾。遭壅遏不得裂地浮。又疑海水載地舟。巨鰲塌損飛輕漚。火救腦兒迷兩眸。擺落星宿來東陬。細點散注波面鱗。雪山中涌風雷糾。日背突視瞬不收。恍聚百怪神靈愁。咋舌仰看天上頭。餘霞綺散雲光流。太虛萬象同一邱。蟾蜍東出織阿遊。山光隱現入半樓。弄珠之神虛無留。江婁海婁驟銀虬。金支翠旗

隱暮簪夜深彷彿聞清謳歌眠枕簟臨龍湫酣然身

出吾莊周

陳維崧
篋行集

張元杓突泉歌濟南名泉七十數冠以杓突餘皆附
何年平地湧洞開從中陡湧三珠樹濤聲直撼蓮子
湖湍激欲濺華不注珠璣散墮閃晶光冰綃碎剪噴
寒霧有時斜風捲地來橫曳飛流凌空渡紅欄窈窕
入顛波寶剎玲瓏綴秋露恍惚白晝走驚霆咫尺青
天駭傾霍眼前但恐天吳翻足下更防支祈怒豈是
銀河蟠地底斷裂天根起雷馭海門東下一千里歸
墟直欲滄溟過沐日浴月蓋三山滉漾乾坤錯朝暮

吁嗟此泉來王屋萬里狀流不肯住却來歷下迸雲
根管領名泉恣吞吐始知濤發有淵源金流石爍常
如故泉邊清淑躍紅鱗泉上晴沙立白鷺杈枒老樹
蔭空濛亭臺高下森田互雲章爛漫揭中間下俯泉
流垂寶璐亦有詞人耽宴遊短咏長吟紛題註我來
但取壁上觀袖手未敢誇能賦膽壯吾友破天荒因
賡第一名泉句

綠筠軒集

觀濶亭咏趵突泉詩二首城隅饒勝概亭枕趵泉頭
陡湧三峯雪平分萬里流潯涵涵月榭湍激漾汀洲
為會觀濶意悠然濠濮秋

頓覺塵襟滌臨流嘆望洋顛波駭灑潏潏澄碧徹瀟湘
伏地蟠根遠朝宗去路長此中涵道妙水鑒寄滄浪

同上

沈心鉤突泉詩破曉郭西遊輕策緣獨結伏流王屋
來至此何奮決聲聞百里雷光艷三堆雪清歡洽魚

鳥遙峯瞰澄淵憑襟白石關妙理不可說

孤石山房集

沈廷芳鉤突泉詩川趙松雪舊韻七十二泉天下無
此泉尤足勝方壺一泓遙瀉渺何極三竇高噴長不
枯泉勢凌虛叅古木日光倒影射澄湖更來白雪樓

中眺啜茗觀碑興未孤

隱拙齋集

盛百二趵突泉呈沈椒園先生詩憶昨息塵鞅高樹
秋蟬鳴寒風烈以厲節候窮元冥復此泉上遊頓覺
景色清寒條少條綠霜露日夜寒泉流無緩響滔滔
赴東溟不謂咫尺波具有萬里程造化若循環新故
一息更南峯對歷山蒼翠猶崢嶸達人謀不朽共有
千秋盟寒潭如可掬鑒此勞者情

皆山樓吟藁

泺水會金線諸泉之水北引為川滿井北煮糠二泉之
水自西來入之水經注所謂大明湖疑在此辨詳見前
名泉碑曰滿井曰北煮糠在趵突北

齊乘

按今有石刻名杜康泉者或即北煮糠以聲而記

也

灤水又北分為二渠名曰夾河以防山水之暴漲也平時東流恒微皆有橋藉以木為之名大板橋即舊志之廣會橋也後易以石然土人猶呼大板橋又東北為城河馬跑淺井洗鉢諸泉之水自東南來入之馬跑諸泉皆出城西南隅匯為城河又東南受演武臺後南開之水西北流里許注於灤水

名泉碑曰洗鉢在登州東北曰淺井曰馬跑在洗鉢

西南

齊乘

洗鉢泉在馬跑西金線正北流入城濠

舊志

淺井泉在洗鉢西南今考在馬跑泉東西營城河內
馬跑泉在金線東北前有橋水北流入城濠

廣會橋在城西南跨跨突泉下流

夾河小橋在跨突下流至廣會橋分之以殺其勢下
復合入城濠洗鉢馬跑之來自東南來會

火神廟前有橋獄廟前有橋梁家橋新橋俱南關

西響閘城西南隅當馬跑諸泉之水

以上俱舊志

灤水又北即直縣之西門矣復分為二而西流恒微有
橋名灤源橋蘇子由有記舊志之洪濟橋亦在此又北
與西流合古溫泉水自西來注之古溫泉西連天鏡泉

五龍潭諸水太平寰宇記所謂四望湖疑在此今龍潭水北流溫泉自入城河亦與宋時水道不同矣

四望湖在縣西二百步其水分流入縣城至街中與孝感水合流入州城西出四泉合流

太平寰宇記

洪濟橋在齊川門外

舊志

蘇轍灤源橋記灤水之源發於城之西南山下北流為堙其淺可揭城之西門跨而為橋自京師走海上者皆道於其上每歲霖雨南山水潦暴作滙於城下橋不能支輒敗熙寧六年七月不雨明年夏六月乃雨淫潦繼作橋遂大壞知歷城施君辯言於府曰水

歲為橋害請為石橋以舒其役距城之東十五里有
廢河敗堰焉其棄石鐵可取以為用府用其言以告
轉運使得錢二十七萬以具工廩之費取石於山取
鐵於府取力於兵自九月至十一月而橋成民不知
馬三趺二門安如卸陵驚流循道不復為虐方其未
成也太守李公日至於城上視其工之良窳與其役
之勞佚而勸相之知歷城施君實具其材兵馬都監
張君用晦實董其事橋之南五里有大溝焉屬於四
澗以殺暴水之怒久廢不治於是疏其堙塞築其缺
而完之橋之西二十步有溝焉居民裴氏以石壅之

而屋於其上水不得洩則橋受其害亦使去之皆如其舊而止又明年水復至橋遂無患從事蘇轍言曰橋之役雖小也然異時郡縣之役其利與民共者其費得量取於民法令寬簡故其功易成今法履於卹民一切仰給於官官不能盡辦郡縣欲有所建其功比舊實難非李公之老於為政與二君之敏於臨事橋將不就夫橋之役雖小然其勞且難成於舊則倍不可不記也遂為之記

樂城集

樂水又循城而北直城西北隅分為二一北流一循城而東其北流者舊有閘二曰永清曰廣濟

永清閘在城西北一名衛閘西城之水由此出舊志。

廣濟閘在邊家莊前一名分水第二閘也

聽水閘在標山西北永清五柳之總閘也

彭徵廣濟閘記峇濟南城北二里許舊有閘名曰分水水源出自趵突諸泉襟帶城郭紫廼畦苑立閘瀦蓄歲灌溉歷田數千頃秔稻豐稔民獲倍利永樂庚寅圯於瀑澇歷久弗治水耕轉於陸種賦額包於稱貸天順二年夏副都御史年富巡撫是邦惠養黎元時循阡陌間道於閘顧謂方伯李顯憲使劉孜曰水之行在地利之興在人豈利於昔而不利於今乎乃

命郡守陳銓暨推官齊魯修復其舊翼日輦石於山
市木於叢食給助工之雜糧工役備操之壯民以畚
以簣以椿以砌中累石為兩崖限置石槌局用大木
板視水之高下而閉縱之堰之北植柳樹以根據之
堤之畔甃磚石以堅固之經營規畫深廣壯固視昔
有加歲己卯正月八日始事二月中畢工府庫不知
其費域民不知其勞田不病乾舟不病涸民食國賦
不病其餒乏逋負吁仁人之厚於民也如是哉後之
吏於斯土者幸勿廢前人之功隨時補葺則其利千
載如一日矣閏既成更名曰廣濟命徵紀其顛末勒

石傳之俾後世知有所考焉天順三年三月三日

以上

俱舊志

灤水又西北左會五龍潭諸水五龍潭南有東西蜜脂諸泉皆北流匯於五龍潭又北右會賢清泉水又北左會錦纏溝水又北入於灤

名泉碑曰東蜜脂在金虎西南西蜜脂在東蜜脂西曰灰灣曰懸清在城西五龍堂東曰雙桃在城西丁字街北

齊乘

東蜜脂泉在天鏡泉東流入灰灣

齊志

五龍潭在西門外五龍宮東潭深不測疑有蛟龍大

旱攬潭往往得雨

西窰脂泉在五龍潭坊西流入五龍潭

灰池泉在五龍潭東

混沙泉在灰池南流灰灣入大清河

灰灣泉在五龍潭東

雙桃泉在丁字街舖屋下由地中經窰脂江家池入

五龍潭

天鏡泉在五龍潭南即江家池方廣一畝可鑑鬚眉

觀察張公鶴鳴改今名流經五龍潭入大清河

江家池在五龍潭前

懸清泉在五龍潭東一名賢清今名三娘子灣流經于家橋入大清河

三娘子灣在西門外東流水北世傳有女子三人齊墜於此故名

按三娘子灣或曰即賢清泉之所由名也

小河在龍潭迤北密脂諸泉匯為溪流蓮塘蔬圃相錯如繡垂柳覆堤遊人就浴其流北注稍折而西入於聽水

劉家橋在東流水西北龍潭諸水出其下

錦纏溝在捍石橋下西南山水所注經迎仙橋北流

入小河

煮糟泉在四里山今考山下無泉或即道旁野井也
二里壩在城西二里趵突泉南延袤二里餘夏秋南
山諸水暴漲捍之使西下達錦纏溝今雖漸圯遺石
猶存及時修之為費尚小因循不治此堤一潰趵泉
數百家必受漂沒之害矣

捍石橋在西關跨錦纏溝嘉靖元年重修

迎恩橋在迎仙樓下正德十五年建

三空橋在北壇北錦纏下流

以上俱舊志

按錦纏溝水源出八里山東南北流經二里壩康

熙某年重修又西北流煮糟泉水自四里山下入
之又北流有捍石橋又北流經迎仙橋又北流自
標山東注於灤

王元樞遊趵突泉過杜康天鏡二泉至五龍潭詩既
協樂山情還志樂水性濟南多名泉灤源於斯盛脣
沸連寶直潄汨分谿橫延賞意有愜追奇興未竟我
將挹甘醴行復臨皎鏡陽宮夢崔嵬陰潭含汀滢匝
樹看無邊落響聽遙應始知前流轉還與後川迸感
逝傷年逾鑑止識心定緬邈涼埃捐顧瞻浮雲淨

灤水又西北經標山北至老鶴橋後納其東流所分之
水水之分也凡二一分自黃家橋西北經故白鶴書院
南又西北經雲莊南入老鶴橋一分自滾水壩凡三曰
王府溝曰滾水門曰廣惠閘北合為一流又西北經張
養浩墓北又西南會於老鶴橋二水之西北流者居民
多引以溉田三齊記所謂鵲山湖西陽雜俎所謂蓮子
湖遺跡皆此地也

三齊記歷水與灤水同入鵲山湖

太平寰宇記

歷城北二里有蓮子湖周環二十里湖中多蓮花紅
綠間明乍疑濯錦又漁船掩映罟罾疎布遠望之者

若蛛網浮杯也魏袁翻曾在湖讌集叅軍張伯瑜諮
公言向為血羹頻不能就公曰取灤水必成也遂如
公語果成時清河王怪而異焉乃諮公未審何義得
爾公曰可思湖目清河笑而然之而實未解坐散語
主簿房叔道曰湖目之事吾實未曉叔道對曰藕能
散血湖目蓮子故令公思清河嘆曰人不讀書其猶
夜行二毛之叟不如白面書生

百陽
雜俎

廣濟閘在府城北

陸通
志

五柳閘在府城北八里雲莊後嘉靖九年都御史陳

鳳梧命同知宋璵建

同上

小新閘在府城北五里黃臺山前

同上

灤水自大明湖東北流注華不注山下滙為湖今為
就酒按灤水偽齊劉豫時乃自城北導之東行四里

小清河不名鵲山湖久矣

天下名勝志

鵲山湖府北二十里湖北岸有鵲山因名

方輿紀要

鵲山湖城北十五里灤水自大明湖北流繞於鵲華
匯為湖李北海與杜少陵同游鵲湖憇歷下亭各有

詩今鵲湖莽然田壤無復烟波

舊志

廣惠閘在利田閘西天順四年中丞年公富建

五柳閘在廣惠閘西

老鵲橋在劉家橋西府閘之水出其下

勝濟橋在老鵲橋北五柳之水出其下

以上俱舊志

衛既齊五柳閘記畧濟南有大小清河距城北二里許有閘名曰分水濟水多伏至歷城湧為趵突諸泉分入二清河立閘蓄用資灌溉其閘有衛府等名天順初巡撫年公富復建廣惠閘閉則東城之水經利田達崇正開則西入五柳矣今大司馬中丞佛公留心民瘼一日率僚屬巡行郭外山川掩映畦苑參差顧而樂之歷視諸閘堰見有木石傾圯者詢之則五柳閘即所謂衛閘者也因謂曰茲閘不修則水勢

浮鬱矣以利蓄洩浸陂田皆應曰諾余與同官諸君子謀曰古人為學必講求農田水利之宜將以贊致諸用也茲堰當修治之如大中丞言又皆曰諾於是各捐俸資輦石布木鳩工計庸補其缺壞俾之堅好兩崖新置石槌為用大木板視水之高下盈縮以時啟閉庶其緒前人之功而有利於斯民也是役也始庚午之三月不二十日告竣維時倡率者兵部尚書巡撫部院佛公倫同事者按察使司今陞布政使楊公廷耀分守濟東道兼叅議陳公俞侯運使兼鹽法道今陞按察使喻公成龍督學道僉事任公塾掌印

都司陳公伯壽濟南府知府蔣焜濱濼分司劉沛引
膠萊分司朱文蔚督工則歷城縣知縣王道隆布政
司照磨王文斗例得併書康熙三十年歲次辛未仲
春吉旦通奉大夫山東等處承宣布政使司布政司
今陞順天府尹邠陽衛既齊撰

碑據

岳濬減壩浚河以杜水患碑記畧濟南城內之水出
北水門由林家橋洩入鹽河其中有香磨四座磨旁
置石壩高丈餘閘水不使暢流上游之水遂多泛溢
為患至磨雖創自前明不便拆毀本部院親勘情形
籌加籌畫惟將石壩減去數尺修成陡壘添置閘板

常時聽其攔閉遇雨多水發將石板盡啟俾水得下
注免致泛漲但四壩現有積水難於改修將一二三
等壩壩旁開引河導水旁流其第四閘岸高無可旁
引築堤分水使各涸出壩底如法修減令歷城縣丞
專司啟閉不許磨戶姦徒潛行修改仍於壩旁鐫碑
以垂永久

同上

李白陪從祖濟南太守泛鵲山湖詩三首初謂鵲山
近寧知湖水遙此行殊訪戴自可緩歸橈

水入北湖去舟從南浦迴遙看鵲山轉却似送人來
湖濶數十里湖光搖碧山湖西正有月獨送李膺還

太白集

邊貢鵲山湖送維正李憲副詩齊門東沙徑平雲漠
漠湖冥冥使君來麥秋晚柳陰陰畫舟遠瘦蒲疎荇
逗遛香南浦烟光接西堰堰北山靈鳥相聚對面尋
顏華不注山前綠稼隱蒨茨舊是齊僊釣遊處橫橈
越水許飛踏青芙蓉華陽洞口跨白鹿醉吹玉笛呼
眠龍長鉞野老逐李邕錦袍仙人隨赤松石壁土花
秋靡靡古蹤悠悠鎮如此要留灑翰洗蛙蟬滿林夜
黑啼山鬼

華泉集

王廷相鵲山湖詩漫漫鵲湖水中夏如巨壑一舸汎

中潭蕩漾香難泊鼓角奮以揚蛟螭靜不惡簌弄紅
錦湍搖裔翠華薄陰霞倏明滅游禽靄紛錯發棹梵
音浦把酒北城閣悵茲人代速湖山宛如昨不聞北
海還空覽少陵作高標耀白日浮踪等飛霍湖水清
且漣玉纓不復濯吾生諒有涯昔賢徒龍蠖俛首忽
悲嘯且盡手中爵

陸通志

馮裕鵲湖詩昔年秋興逸每泛鵲山湖亭下采新藕
船邊迴野鳬滄浪歌正激白露酒頻沽何日重遊此

清風月滿蘆

方伯集

王象春鵲湖詩江都為主少陵賓一代風流問水濱

魚鳥陸沉魂怨悵幾時重啟外湖堙

齊音

李應聘鵲山湖詩太液渾如鏡裏看漁人垂釣鵲湖

千曉涵萬頃玻璃淨夜浸中天星斗寒細雨濛濛添

鴨綠微風拂拂動鷗潮燒丹此日今何在山色蒼蒼

夕照殘

舊志

谷繼宗泛湖詩北門行指出東月坐觀生筆硯風駭

意簫銑水調聲酒帘翻樹暗漁竈倚灘明醉與舟師

語無妨卧入城

同上

灤水又西北左納黃岡南之水又北左納黃岡北柳塘
河水黃岡前後之水源出玉函山其出玉函山東北者

流經玉函山北為十六里河又西北經奎山北為十里河十六里十里皆以去城遠近而名也其出玉函山東南者流經玉函山南為大澗溝又西北經北仙嶺北又西北右納朱家林水又西北經龍窩山西又北經白馬山西有石橋又北經紅廟莊有昇仙橋又東北會十里河水又北經段店莊有段店橋又東北有太平橋又東北匯於筐山之麓為堤口窪又分為二一東北流自黃岡山南入於灤一東北流為柳塘河一名柳姑河又名柳溝自黃岡山北經藥山前入於灤柳塘河之上流近漸為沙淤夏秋水漲反折而西會長清獵山西之水北

經藥山西由傅家溝入大清河舊有橋二皆頽圯今俱重修

黃岡橋在府城西黃岡嘉靖十二年巡撫袁宗儒巡按方遠宜用有司議開濬黃岡廢河自筐山鋪經長清縣界抵段店華家口諸水隘塞處悉疏掘之達於鹽河以防伏陰暴雨泛漲乃因筐山西廢橋甃石新之又建板橋於西南見教諭王僕記

陸通志

柳塘河在黃岡山後

舊志

崔應階黃岡二石橋記濟南城西十二里驛路經高阜曰黃岡斥堠在馬行人自西來者至於岡而城郭

湖山之勝始可得而覽也岡西盡處有水石橋跨其上碑載嘉靖壬辰重修於巡撫袁公宗儒後屢圯屢築莫可考水發源城東南玉函山流三十里循岡而東北至香閘村入灤其故道也雍正八年橋北故道塞水之北者旋折而南沿路西行半里許會長清獵山東西之水復折而北行七里入大清河蓋一水而穿路者三焉其二無梁夏秋濡甚行者病涉且四十年矣乾隆丁亥春予乃謀於歷城胡令德琳伐石為橋二東橋距舊橋數武洞六高七尺長六倍之寬丈二尺五寸西橋南直匡山洞九高於東者一尺長七

丈寬三分其長而殺始作至歲事凡百七日費錢始
千緡橋成而過者履之坦然不知其橋也蓋舊橋隆
中而削末車騎艱於登陟今二橋皆與路平既堅可
久又便奔馳許氏說文謂喬高而曲古法其可盡拘
乎胡君性平易不為焦嶢難攀其民皆游乎康莊而
不知其利一橋也亦足驗其政矣是歲閏七月巡撫
楚鄂崔某記

灤水又東北入於大清河自灤源至此可十五里即水
經注所謂灤口也

王士正灤口詩灤口千家聚烟波遠近村沙鷗飛水

市石瀨到閒門出翠曉將滴蘋香秋正繁臨流魚鳥

興瀟灑獨開樽

漁洋集

歷城縣志卷第八終

歷城縣志

卷第八

山水考二

哭